

- राज्य मांय लोकसभा चुणाव रा पैला दौर रा तैत 12 सीटां माथे प्रचार रो काम काल पूरो व्हेला-न्यारी-न्यारी पार्टियां रा नेता जोरदार प्रचार कर रह्या है।
- केन्द्रीय वित्त मंत्री अर भारतीय जनता पार्टी री आला नेता निर्मला सीतारमण कह्यो- भारत री माली व्यवस्था तीन माली साल मांय सब ऊं तेजी ऊं बढ़ती माली व्यवस्था रही।
- प्रदेश ऊं बहुजन समाज पार्टी रा दो विधायक आज शिवसेना शिंदे गुट मांय भेळा व्हे गया।
- दुर्गा अष्टमी रे मौके आज घरां अर मिंदरा मांय खास आयोजन।

000

प्रदेश मांय लोकसभा चुणाव रा पैला दौर रा तैत 12 सीटां माथे 19 अप्रैल ने पड़बा वाळा वोटां सारू काल सिंज्यां प्रचार रो काम पूरो व्हे जावेला। आज ही भाजपा, कांग्रेस, राष्ट्रीय लोकतांत्रिक पार्टी अर माकपा समेत न्यारी-न्यारी पार्टियां रा नेता न्यारी-न्यारी ठौड़ां प्रचार कीनो। भाजपा रो नेता अर मुख्यमंत्री भजन लाल शर्मा आज नागौर लोकसभा हलका रा कुचामन मांय भाजपा री उम्मीदवार री हिमायत मांय रोड़ शो कर रह्या है। उपमुख्यमंत्री दिया कुमारी ई नागौर लोकसभा हलका रा परबतसर मांय जनसभा ने संबोधित कीनी। वे प्रधानमंत्री नरेंद्र मोदी री अगुवाई मांय लारला दस साल मांय करी ज्या विकास रा कामां रो जिक कीनो। भाजपा रा आला नेता डॉ. किरोड़ी लाल मीणा आज बूंदी मांय अर करौली-धौलपुर अर दौसा लोकसभा हलकां मांय न्यारी-न्यारी ठौड़ां जनसभावां मांय भाषण दीनो। आं रे अलावा राज्य सरकार रा केई मंत्री अर भाजपा रा ओहदादार ई पार्टी रा उम्मीदवारां रो प्रचार कर रह्या है। दूजी कानी राज्य रा पैली वाळा मुख्यमंत्री अशोक गहलोत आज अजमेर रा आजाद पार्क मांय कांग्रेस रा उम्मीदवार री हिमायत मांय जनसभा ने सम्बोधित कीनी। वां रो आज जयपुर रा रामगंज बाजार मांय जनसभा करण रो ई कार्यक्रम है। कांग्रेस रा प्रदेश अध्यक्ष गोविंद सिंह डोटासरा आज सीकर मांय इंडी गठबंधन रा उम्मीदवार अमराराम री हिमायत मांय रोड़ शो री अगुवाई कीनी। पार्टी रा आला नेता सचिन पालयट रो आज दौसा लोकसभा हलका रा चाकसू मांय रोड़ शो करण अर जयपुर लोकसभा हलका रा खो-नागोरियान मांय जनसभा ने संबोधित करण रो कार्यक्रम है।

000

लोकसभा चुनाव रा दूजा दौर रा तैत राज्य रा 13 लोकसभा हलकां मांय बुजुर्ग अर दिव्यांग मतदातावां ने घर ऊं वोट देवण रो सुबीतो मुहैया कर्यो जा रह्यो है। बूंदी री 92 साल री जागीर कौर अर भंवर बाई घर ऊं वोट दियां पाछे निर्वाचन आयोग रो आभार जतायो। बूंदी री रजतगृह कॉलोनी री 86 साल री दिव्यांग मतदाता प्रेमलता ई चुनाव आयोग कानी ऊं घर ऊं वोट देवण रो सुबीतो मुहैया करावण री सराहवणा कीनी। टोंक जिला मांय हाल ताई 363 मतदाता घर ऊं वोट देवण रो सुबीतो काम लीनो है।

000

लोकसभा चुनाव मांय वोट देवण बाबत् जाग जगावण सारू जयपुर नगर निगम हलका मांय मतदान केन्द्रां माथे सब ऊं पैली वोट देवण वाळा 50 मतदातावां रो मान कर्यो जावेला। जैसलमेर मांय सतरंगी सप्ताह रा तहत जिला निर्वाचन अधिकारी प्रतापसिंह पोस्टर रो विमोचन कीनो। सलूबर जिला रा देवपुरा गांव मांय स्कूल रा बच्चा मतदाता जागरूकता रैली निकाळ र वोट जरूर देवण रो संदेश दीनो। गांव रा चौराहा माथे बच्चां नाटक कर र बिना डर्यां वोट करण री अपील कीनी। टोंक जिला रा देवली मांय छात्रावां हाथां मांय मेहंदी लगा र वोट देवण रो संदेश दीनो। पाली जिला रा श्रीसेला मांय एक स्कूल मांय वोट जरूर देवण री अपील करता थकां चुनाव प्रकिया रो वीडियो

बणा र प्रकिया समझायी ज्यी। सवाईमाधोपुर मांय आज बालिका आदर्श विद्या मन्दिर मांय बूथ अवेयरनेस कार्यक्रम राख्यी ज्यो। जोधपुर मांय जिला निर्वाचन अधिकारी सुगम्य पोर्टल री सरूआत कीनी। वे बतायो के ई पोर्टल ऊं जाणकारी कर र चुणाव रे दिन लम्बी लेणां ऊं बच सकेला। कोटपूतली-बहरोड मांय दिव्यांग मतदातावां मांय जाग जागावण सारू जागरूकता रैली निकाळी ज्यी। श्रीगंगानगर मांय मतदान वृक्ष बणावण सागे मतदाता जागरूकता रैली निकाळी ज्यी अर मनरेगा रा तैत काम कर रह्या मजूरां ने वोट देवण री सौगंध दिरायी ज्यी। सूचना अर प्रसारण मंत्रालय रा केन्द्रीय संचार ब्यूरो कोटा री ओर ऊं छोटी अर बड़ी सोगरिया मांय मतदाता जागरूकता कार्यक्रम राख्यी ज्यो।

000

लोकसभा चुनाव मांय वोट देवण बाबत् जाग जगावण सारू आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला।

.....
न्यारा न्यारा जिला रा निर्वाचन अधिकारी अर एस पी ई मतदातावां ने जागरूक करण मांय लाग्योडा है। दौसा री पुलिस अधीक्षक रंजीता शर्मा मतदातावां ऊं वोट जरूर देवण री अपील कीनी।

.....
सवाईमाधोपुर रा जिला निर्वाचन अधिकारी खुशाल यादव ई मतदान दिवस परां सगळा लोगां ऊं वोट देवण रा काम मांय बढ चढ र सिरकत करण री अपील कीनी।

000

केंद्रीय वित्त मंत्री अर भाजपा री आला नेता निर्मला सीतारमण कह्यो है के भारत लारला तीन माली साल मांय सब ऊं तेज बघती माली व्यवस्था रही है अर आ बघोतरी आवता बरसां मांय चालती रेहवण रा आसार है। वे आज जयपुर मांय उद्योगपतियां, कारोबारियां अर पेशेवरां रा कार्यक्रम मांय बोल रही ही। सीतारमण कह्यो के आवता 25 साल भारत सारू घणा खास है। वे कह्यो के माली साल 2023-24 री तीन तिमाही मांय देश देश री विकास दर आठ फीसदी रही। वे कह्यो के भारत री माली व्यवस्था री विश्वसनीयता रे कारण विदेशी निवेशक भारत मांय निवेश करण सारू आ रह्या है। सीतारमण कह्यो के माली नीति, स्थिरता, स्थिर सरकार, स्थिर कराधान नीति अर साफगोई सागे टेंडर प्रकिया रे कारण दूजा देशां मांय भारत री माली व्यवस्था माथे भरोसा बध्यो है।

000

प्रदेश मांय बहुजन समाज पार्टी रा दो विधायक आज शिवसेना-शिंदे गुट मांय भेळा व्हे गया। मुंबई मांय महाराष्ट्र रा मुख्यमंत्री एकनाथ शिंदे री मौजूदगी मांय आज सादुलपुर रा विधायक मनोज न्यांगली अर बाड़ी रा विधायक जसवंत सिंह गुर्जर बहुजन समाज पार्टी छोड़ र शिवसेना मांय भेळा व्हे गया। महाराष्ट्र रा मुख्यमंत्री एकनाथ शिंदे सोशल मीडिया प्लेटफॉर्म रे जरिये आ जाणकारी दीनी। ई मौके न्यांगली कह्यो के वे लोकसभा चुनाव मांय भाजपा रा उम्मीदवारां री हिमायत करेला। आं दोन्यू विधायकां रे शिवसेना मांय भेळा व्हे पाछे अब राजस्थान विधानसभा मांय बहुजन समाज पार्टी रो कोई विधायक नी बच्यो है। बहुजन समाज पार्टी रा विधायक पैली भी दो दफा साल 2008 अर 2018 मांय चुनाव जीतण रा कुछ बगत पाछे दूजी पार्टी मांय भेळा व्हे गया हा।

000

दुर्गाष्टमी रो पर्व आज आखा राज्य मांय सिरधाभाव सागे मनायो जा रह्यो है। ई मौके शक्ति पीठां माथे खास पूजा अर अनुष्ठान कर्या जा रह्या है अर घरां मांय मां दुर्गा री पूजा अर्चना करी जा रही है। दुर्गाष्टमी रे मौके कन्यावां ने जीमायी ज्यी। शाहपुरा री प्रमुख शक्तिपीठ धनोप माता अर घाटा रानी मिंदर मांय खास आरती करी ज्यी। बांसवाडा री शक्तिपीठ त्रिपुर सुंदरी मिंदर मांय खास मंगला आरती करी ज्यी। जैसलमेर री शक्ति पीठां मांय ई मोटी तादाद मांय जातरू पूग्या। सवाईमाधोपुर जिला मांय चौथ का बरवाडा रा चौथ माता मिंदर मांय ई खास कार्यक्रम व्ह्या अर माता रो खास श्रृंगार करी ज्यो। बूंदी जिला रा इन्द्रगढ रा बिजासन माता मिंदर अर हंसा देवी मिंदर समेत सगळा देवी मिंदरां मांय मोटी तादाद मांय जातरू पूग्या। करौली मांय कैलादेवी, भरतपुर मांय झील का बाडा रा कैला मैया मिंदर, सीकर मांय जीण माता मिंदर, हनुमानगढ मांय भद्रकाली मिंदर अर पल्लू रा ब्रह्माणी मिंदर मांय मेळा भर रह्या है। जैसलमेर मांय पाकिस्तान री सरहद ऊं लाग्योडा तनोट माता मिंदर मांय ई दुर्गाष्टमी रे मौके बीएसएफ रा जवान मिंदर परिसर मांय सोहवणी सजावट कीनी अर हवन अर यज्ञ रा आयोजन राख्यी ज्या।